

四庫全書

集部

欽定四庫全書

集部

陶學士集

目錄
卷一

詳校官中書 臣 呂光復

中書臣劉源溥覆勘

覆校官中書 臣 朱 鈐

校對官中書 臣 吳 俊

謄錄監生 臣 羅翽遠

五言律詩

卷四

五言律詩

五言長律

卷五

七言律詩

卷六

七言律詩

欽定四庫全書

集部六

陶學士集目錄

別集類五

明

卷一

四言古詩

五言古詩

卷二

七言古詩

卷三

卷七

七言律詩

卷八

七言絕句

卷九

七言絕句

卷十

歌

賦

詞

卷十一

序

卷十二

序

卷十三

序

卷十四

序

卷十五

引

卷十六

記

卷十七

記

卷十八

說

卷十九

墓銘

行狀

哀辭

壙志

文

卷二十

雜文

臣等謹案陶學士集二十卷明陶安撰安字
主敬當塗人元至正八年中浙江鄉試後佐
明太祖官至江西行省參知政事事蹟具明
史本傳是集詩與文各十卷安以儒生受知
明祖參預機密典司著作郊社宗廟皆有議
若明初分祭南北郊及四代各一廟之制皆

定於安又刑律亦安所裁而其議論均不詳
著於集未審其故殆當時秘不欲宣也其詩
一曰辭達集一曰知新近稿一曰黃岡寓稿
一曰鶴沙小記一曰江行雜詠今此本分體
編之與所作賦詞共為十卷文亦十卷而送
人之序引居其半豈以安當時宿望求贈言
者多耶世言祝壽之序自歸有光始入集然
此集內已有二篇則不自有光始矣安文章

雖不及宋濂之俊偉而其詞類皆平正典實
有先正之遺風一代開國之初其氣象固不
侔耳乾隆四十一年十月恭校上

總纂官

臣紀昀

臣陸錫熊

臣孫士毅

總校官

臣陸

費

墀

欽定四庫全書

陶學士集卷一

明陶安撰

四言古詩

詠鳧山

并引

鳧山送賈公也公家武棠儒術入官歷省憲宥府朝選
清望領鹽司由行省郎中為兩浙轉運使政令煥新其
廉澹寡欲尤人所難既滿而歸故作是詩以送之

鳧山蒼蒼魯邦是瞻篤生哲人蹈德有嚴雍容儒紳典

教于學政府遴才資其謀度河渠有書兵戎有樞迺振
憲綱迺乘倅車開省東南坐籌賓幄股肱碩輔聞言是
諾浙司之齷國賦倚重帝睠老臣副予寵用煮醎于海
民勞不容公善理財毋敢或欺匪衡益平匪鑑益明利
周于物幣貢于京視彼貪虐斂害于民怨詈滿途亦獨
何人豈弟君子不忮不求豈弟君子不剛不柔魚臺仰
止遥遥我心駕言旋歸懷其德音

鳧山十章章四句

詠當塗張縣尹善政 并序

古者為政躬行率民不待刑罰威令而所感自孚以天
理在心人所同也况縣令於民最親寄命百里苟善其
治雖當俗降政乖之後豈遂不可復乎古觀於張君可
知矣君之治當塗也凡宿弊梗民及民所欲而弗遂咸
除而舉之廷訴者誨以婉辭輒釋訟去然法所宜直彊
誑莫能投其詐窮弱得以伸其鬱故人無缺望焉縣負
郭帶江當南北要衝供億繁多不立威而事集人免於

擾憲臺新令覈詭寄田君適病不視事吏署案設罪畧
欲掩民入無慮數千戶衆惶駭君出焚案易吏令民自
實類田于籍賦役用均民甚安之其操守廉潔內無纖
介私撓弊服羸馬意常充如閉戶燕處澹靜堅苦人所
難堪而居之自裕自蒞事連歲大穰水旱不為災蝗飛
不入境務以德化下用是皆恥犯法鬪競者寡部使者
考視案牘寥寂無幾父老賀曰吾邑入職方氏七十年
未嘗見此賢宰郊野間無少長聞稱縣令每額掌敬歎

及代相與齋客弗釋以是觀之張君為縣能得匹夫之心蓋由躬行率民無愧古之賢大夫矣君名兌字文說湖南人登進士第余性介直弗阿見其官三載表裏始終常一致也故序其槩頌以詩曰

有美君子嘗觀國光賢書載登赤紱斯煌再命陞爵來于荆湘尹茲百里編氓樂康理涵于心道積于身克施有政民德亦新耕桑被野雨暘屢勻衆庶而豐侯儉而貧民有鷄豚我盤蔬茹民有紈帛我衣布素閔厥

士女瘡痍是撫瘡痍既瘳我體完固 公綽不欲勝薛
非長子產惠愛刑書靡良侯兼其德政有紀綱三年化
行嘉猷孔彰 英英白雲遠瞻是惻適歸于南承顏有
懌願為時雨均此下國維茲邑人永思無斁

五章章八句

詠蘇守義妻齊氏

并引

烈女齊氏者安平縣新莊人也縣隸真定晉州齊甫筭
適同里蘇守義事舅姑勤修婦道至丙戌孟夏守義病

篤謂齊曰我病度不愈幸有兄養母爾年少改適後人
可善事之齊曰忠臣烈女不懷二心守義死哀慟幾絕
謂家人曰夫垂卒囑以善事後人吾甚恥之願即死徇
葬以明不它家人驚駭相與守視纔少緩遂自經即夫
喪日也有司上聞旌死節于門復其繇役保定張庸道
通守太平戾止泮林進教官諸生語其事余為之詩曰
幽燕之南晉趙之疆刀鋤劔樵其人勁強安平故邑村
有新莊懿彼貞女曰齊之姜來嬪于蘇功容並良孝周

舅姑禮謹閨房夫遘危疾永訣在牀謂汝改適憐其早
孀齊澁丹誠執心孔剛誓無辱身寧甘自戕夫目遙瞑
妾命乃長胡能獨生曷若偕亡金石可朽言弗忍忘罔
陵可移義弗忍傷九原當見以死自明永謝膏沐魂離
室堂欲拯何及舉族悲惶行高千古事昭一鄉守宰嘉
歎憲使薦揚旌命自天門閭有光斷鼻執義夏侯德彰
剔目示信房盧性臧誰能捐軀同穴而藏恒山鬱蒼厥
高莫量烈烈令聞能與之京張侯戾學稱善洋洋激勵

孝忠增重綱常作此雅歌亘久彌芳

詠張同知

并序

田賦歲供始於斂輸終於漕運事煩責重為政者難之
夫斂輸集於倉廩漕運達于畿甸得人綱摠則利入於
國害不及民故行省遴官平其出納焉至正丙戌冬姑
孰貳守張侯以省命監斂三縣租視事倉廩剝剔宿弊
均一斗石朔風沍寒戴星出戶昏夜始歸遠郊外邑舟
車囊橐如期紛至躬驗露積簸麓精鑿吏無以售其姦

民得以節其費仁厚之意藹然被物斂輸既畢省委視
平江漕運馳驛遙往自春徂夏海艘綿聯瓊粳山峙額
七十萬準量合制漕夫聽令惴無謹謹乃相謂曰是姑
孰監租剔弊勤事者其可犯乎由是倉厰晏然市肆不
擾其民曰是嘗仁厚彼民今推而及我抑何幸歟又能
防閑周嚴無倫合竊逸贏餘二萬四千石有奇由其累
官在京倉庫漕司故今宜於其職焉侯雅嗜經籍孳孳
古學坐立進退禮習熟每居府署疏決壅滯退食延接

士論馳騁古今性豁如也教官儒流喜侯還治所俾為
詩以詠之僕舊游京師聞譽起慕今灼見其人信有符
於前聞也其何說以辭侯字庸道保定人言行政績之
可徵者豈獨歛輸漕運而已哉既述其事頌以詩曰

有頎之英今德在躬禁闥清華鼓舞皇風命服鞶組寵
任洵隆先猷是經象理貫融乃睠江東臨民敬忠庭訴
自簡倉儲載豐匹馬翩翩霜月在天勤敢謂勞王事繫
焉三吳故墟征賦于田有命轉輸寄委則專南風巨艘

平達于幽待哺林林以樂代憂國廩既充經費是庸侯
官南邦不有其功

題畫牛

并引

畫形易畫意難觀此圖也老不忘舐犢之愛可以會其
意矣為之詩曰

坤道生生為子母牛貌其性情載行載休草茂泉清從
犢後先恐其渴饑愛發于天

五言古詩

送呂經歷詩

并序

新安呂輔之長府幙於太平太平為江左名郡贊其理者宜有簡靜之德以鎮其俗敏達之才以施於用斯為善矣蓋其民習謹厚寡於爭訟府侯端居堂廡肅清幕僚不煩於案牘坐鎮勿擾而已郡地當要衝迎送需給日代乎前金穀之浩穰刑罰之重輕學校之教養營造之經費經歷總諸曹以就緒焉呂君蚤由簿書積勞陞官簡靜敏達皆有之矣府隸江東憲司密邇行臺集慶

寧國太平境相接也政治得失聲實隆污最易著聞而
是郡官無失職事無失道非善贊其理者歟秩滿送以
詩曰

姑孰古藩翰溪山繚城郭出鎮遣重臣分符荷侯爵黃
堂清畫閣蓮香藹賓幕美茲南土彥聲名素昭灼嘉言
吐清婉竒搜破冥漠簡牘日豈無談笑為裁度貞姿澗
畔松高情雲表鶴流光何荏苒新霜點華髮解篆促歸
期遙憶舊林壑江流渺孤蓬春風柳花落才猷時所慕

行矣霑殊渥壯心老不渝雲路參寥廓

送于遵道

并序

學以師古為賢不以戾俗為迂也往聖立心修道酌於
大中嘉謨盛行經綸事物炳炳方策間儒者務學法此
而已古學寥閔士習乃降于時媚象餌近利獵虛聲靡
然莫知其所止當是時也聞有古學之士其不駭然而
笑也幾希無怪乎斯文之微矣以予所知若遵道于君
之學其師古者歟來錄學事於姑孰忘其素富獨寓空

齋閉門終日攻討理致纂述忘疲居不泛交暇不出遊
澹泊其心堅定其志侃侃論辯不改方直況味恬寂若
與世忘不求合乎今而求以師乎古士類賢之世俗迂
之子與遵道同時泮庠交契深厚詩以贈別并序作詩
之意云爾

東南鉅都會龍虎形桓桓文獻萃其間群方聳聽觀之
子邦之彥高情寄儒冠詞林被膏潤華實美以完筮仕
司糾錄官與羶俱寒坐忘梁肉味甘此首宿盤齋居謝

賓客燈窻夜漫漫道契三古心筆意宗孟韓扶滿動行
色送別江之干西風吹白雲心目遙生歡相期敦古道
力行諒非難勗哉追前修萬里高飛翰

送程子厚

并序

莫神於天文流運矣日月經緯之隱見暑寒晝夜之變
遷聖人濬其心智推驗測候使天文無所祕其神裁成
範圍之功益神矣自庖犧畫卦具二十四氣炎帝分八
節以紀農功軒轅迎日推筮而調厯作若分至啓閉之

官建於少昊重黎天地之司命於顓頊式序三辰帝嚳有焉歷象璣衡唐虞先馬夏稱昆吾商稱巫咸周官摠以太史而分保章馮相卜師筮人眠侵挈壺之職其制遂詳時至春秋魯有梓慎晉有卜偃鄭有裨竈宋有子常齊之甘德楚之唐昧趙之尹皇魏之石申皆掌天文以佐國治而巫咸甘石其學尤著五行之說明矣後世沿襲支干星度推人壽夭吉凶悉本五行要必有其理也新安陰陽家程子厚明於天文得古遺意雖天地氣

化渾淪綿邈乃操寸管尺圭約而窺之卒莫有逃焉者也
嘗教授鉛山陰陽學調太平其談演理數推人平生事
曲中焉余觀史遷以陰陽家與道墨縱橫並列然帝王
以陰陽參國政定民時其法肇於上古是知道墨縱橫
之說皆可廢而陰陽家不可廢也意者程君於聖人之
神知所求哉乃賦詩以送之詩曰

於穆蒼靈運元化無始終垂象炳躔逡積閏成歲功茫
茫萬古餘坐致理則同清臺窺玉管緹帷候律甯教筵

分列郡設官傲儒宮新安萬山深閉戶象數攻青袍容
江上賓友藹文風望氣登危城占星指遙空泉清壺漏
滴表正陽晷中寒醴能慰藉杯酒聊自充風高白雲飛
澄波送歸篷佳哉泉石墟樹色環青蔥鳳皇銜書來招
邀游紫宮掃清黃道塵曉望扶桑紅

挽方君政

并序

至正初余訓導姑孰郡庠青陽方君政來正學事遣其
子若孫執禮受業後余去職君亦攝教天門于湖滿考

聽銓吏部余適與計偕乙酉仲春遇君京城南僑舍相
距數步日沽酒慰寥寂聯裾風沙中遊覽都市至大明
殿陞瞻宮禁之神麗未幾予袖禮部符南旋君尋除無
錫州教授冬復抵姑孰舊寓怪其飲減杯至輒辭丙戌
二月會飲余家後數日其三子至自青陽是夕遘疾疾
甚猶致書於余俾子若孫詣余卒業三月十二日卒去
會飲僅匝月所致書乃絕筆也經旬諸孤發櫬舟歸葬
君軀幹剛癯自號庸齋愛談辯摧抑衆論聞一辭中理

則改容服從嘗諭信之永豐杭之於潛歷學正升教授
惜其未任客死志莫獲遂遂作挽詩三章以寄余之哀
思焉

大化何茫茫生死等朝暮見面未幾何幽明已殊路人
皆勸君仕况未年迫暮哀哉萬里行朝命惜虛付雖有
善教才不得一遠布六旬命非促豈不見晞露

知命儉亦樂聞道死乃安平生嗜欲薄既逝寬氣完念
昔久締交文飲意屢歡握手龍墀上天風颯高寒歸來

忽永訣不復共杯盤蓋棺事始定長夜嗟漫漫

雲間九華秀君心豈能忘親朋亦別久終不返故鄉諸
孤泣訴我我亦淚浪浪東風三月暮送柩出泮庠歸舟
駕言發佳城在青陽所期賢子孫勉嗣先業光

贈程希孟

并引

新安程希孟失怙於襁褓母胡氏鞠孤孀居誓無改醮
希孟遵教既有成立游金陵姑孰欲得祿以養其親韓
子所謂雖有離憂其志樂也託物成詩美其事焉

喬林有鳥巢好枝以為依巢中雛始生鳥父去不歸慈
母勤覆育而無暫時違哺食日以肥養翻日可飛煥如
鸞凰文矯若鷹隼威油然反哺心真純乃天機崇臺霜
滿樹翔集遷高巍不然騰雲衢榮光託王畿晨出日未
晞夜歸星正稀所思報劬勞母德如春暉

寄題依綠亭

太平縣湯肯堂

黃山衍餘秀雲巒結層城溪泉抱林麓蒼瑩有餘清肯
堂賢主人締此松竹盟作亭宅幽勝闢園蒔芳榮波光

照簾几天影涵空明依綠意何如聊以濯吾纓漢水鴨
頭色錦江春碧晴向來遠遊處恍惚當軒楹仰視金芙
蓉千峰鬱崢嶸丹崖浮紫氣上接白玉京仙人粲雲裾
下顧如有情翩翩鶴書來閉戶懶出迎俛首玩澄泚但
覺軒冕輕機心晏然息肯使鷗鷺驚洗耳慕高躅深居
愴無營

贈李盤居

有客骨氣清南來自仙都睠此山水地相逢意交孚游

神於先天理象窮六虛炯然雙瞳光為人辨榮枯流觀
文物海妙泄造化樞上有星緯垣下有龍穴區甲子起
上元萬古數不渝泝流探其源竒言如貫珠蹇余久巖
壑澹素以自娛坐視歲月遷不忍棄詩書朋遊或要津
笑我猶癯儒子來筮卦畫謂當應時需廳前共尊酒談
笑忘羈孤天高秋氣肅鴻雁來賓初去意不可留贈之
之瓊琚豈無小山徒招隱上亨衢猗彼盤中人寧久盤
中居時至諒毋失江左暫踟躕

贈風鑿雷霆電

雷迅乃成霆先機爍飛電震動江海間
洞燭魚龍變君術亦如此駭物豁神見
舌端聲欲鼓目光照人面心與造物游
其名匪徒炫蕭蕭蓬髮斑客路猶未倦
敬亭好山色餘翠落團扇秋風淒以高
鄉心逐歸燕

贈斗數梁月淵

璇璣幹元化列宿摠網紀不待衡管窺
理數契玄旨人命有窮通如出其意使
平生鑑物心寒月照淵水曳褐

茅山下開牕挹蒼紫波流送靈槎博望憇游屣仰視北
斗光秋雲接伊邇竒論入杳微尊酒澆磊砢涼颼颯短
袂微露濕寒葦問子去何之長揖挈行李

夜行至香魚館

在滄州
鹽山縣

目送寒日墜暮色變蒼黃近顧已昏冥前店安可望游
子且宵征苦恨晝不長雪深迷古道車陷心愈忙缺月
未出時粲然象星光四無鷄犬聲瓊田白茫茫忽逢人
夜語為我指康莊漸至香魚館叩門燈照牀主翁起迎

勞飲以壺中漿笑問來何遲吹火煮糗糧因知造物心
不使罹害傷命途此可卜力善何能量

送常伯昂

燕雲鬱嵯峨形勢拱北京土厚人勁毅慷慨意氣傾一
有溫恭儒翹然擢奇英夙秉濟物志而無阿世情西江
贊風紀頃步懷廉平嶺海滌氛翳湖湘亦澄清尋登南
廡院愛此霜月明中臺有徵書共說選擇精春殘柳飛
絮送別金陵城子行勿遲遲時事方營營平生報主心

不為利祿嬰致遠自今始側耳聞佳聲

述寓

長明道書院作

夙志慕前矩琴趣愧難續棄米曾賦歸云何效奔逐慈
親日向老無以報鞠育明經不取士奉養心未足攜家
客秦淮蒼苔蔽荒屋年豐公廩虛半載不沾祿妻子樂
從儉朝夕共饘粥母心愛兩孫每食分鼎肉自憐頭上
巾興到無酒漉怡然坐牕下一笑對秋菊

秋風辭送梁生

涼颼蕩平野遠送賓鴻翔蕭颯西北來草木忽變黃不
惜草木黃寒透客子裳曉牕凋鬢影夜堂搖燭光值此
素節晏令人懷故鄉援琴賦將歸苦雨菊有芳盼望掃
積陰下土見太陽明當吹羽翰高飛戾穹蒼

訾伯元孝義

齊國有奇士卓行由性真霸餘俗尚利忽見三代民兵
荒家不殘貨充廩粟陳視義重丘山黃金輕一塵疾疢
雖在親痛實切己身拜醫奉湯藥省養謹夕晨鍾愛賜

厚資誓與兄弟均居喪踰禮制毀墓泣蒼旻田屋讓同
氣舉族衷其仁慷慨割腴產惠利飫孤貧庾袞救疫勤
宋清焚券頻元振給葬費三人罕儼倫今乃兼能之恩
義周鄉鄰孝友萬善原任恤與睦嫻全德古所難事狀
付史臣旌褒光宅里眉壽餘八旬象賢烏府賓寵秩緋
魚新綠庭侍燕喜几席生陽春滔滔濟河流入海去無
垠福澤同其深永以遺後人

仲春雅集分韻得染字

出自行春門山明烟霧斂平湖芳草生野水綠如染園
亭桃李花相映盃漱灑乘風登白紵石路不巖險大江
遠滂漫浮雲開冉冉絕頂尊俎列微醺入腮臉山僧煮
茗迎松下門半掩穿林叩仙洞瓊章借披檢釣臺更留
酌真樂意無嫌因嗟久城市不覺時荏苒今日良宴集
蘭亭視何忝同行皆俊彥冠佩羅整儼臨溪詠而歸悠
然憶曾點

九日登高翠微亭分韻得滿字

山川甚雄麗積雨為磨澣天開秋氣清遊娛共蕭散石
徑接巉巖興到行不懶微霜護新晴杲日送餘煖層巔
躡高寒境勝世所罕蒼茫四無極自恨目力短危亭基
蘚殘麋鹿荒町曠居然龍虎勢城郭在平坦崇阿吊離
宮老木蔭僧館松雲引徐步蘭露入清盥况當重九節
野菊相留欸賓朋笑語間文理謝雕纂好風襲尊俎幽
鳥唳絲管人生光景速每恨樂事緩嘉會幸一逢何辭
累觴滿

觀瀾齋詩

水德靈且長滔滔向東奔忽焉成湍激洪瀾撼深坤縈
盤勢洄洑涵湧聲驚喧晝涵天日光暮蒸雲霧昏齋居
在川上寓目憑幽軒顧瞻發深省因知來有源道體諒
如斯妙契鄒孟言力學當漸進達此入德門汜流窮其
本功勤矢弗諼譬彼遠入海萬里何憚煩

題何氏心遠樓

餘姚山中儒
家余嘗至焉

山深衆喧寂而有太古風西南起高樓居者恬以冲笑

傲浮雲上俯視滄海東遐哉天地濶在我方寸中草木
有生意樂此遺世翁脫彼事物役求道有始終所以平
日志不與淺近同神交羲皇前高趣誰能窮

登舜江樓得換字韻

時左丞阿爾溫沙參政思
寧普分省明州委進士董

朝宗團結
餘姚民兵

承平八十載河海既清晏越東在遐荒武備奉宸斷股
肱二三臣坐鎮防變亂禮羅得名士兵機授成筭下馬
舜水濱官吏服能幹寸心每勤勞百姓免愁歎與客閑

片時登樓愛竒觀憑欄出樹杪振衣在天半諸峯繞城
邑萬室夾江岸鯨濤息狂沸龍泉入清玩霜晴風日佳
暢望百慮散因憶京華春盃酒曾共案別來會聚難轉
眼年歲換旅中得追隨相顧發一粲

登龍泉山得海字韻

蒼峯倚重霄萬古色不改神龍去已遠踪跡隱然在石
面常出泉土脉本通海寶坊起樓閣氣清地爽愜佳菊
金蕤莛古木青晻靄攀磴行復坐瑤草鮮可採賓朋觴

詠間氣味似蘭茝談笑有雅趣巖壑被光彩嘉會有幾
何不醉復何待

次雲觀尊師竹杖詩韻

壬辰春

騎馬京城春久矣棄鞭策甘心曳筇竹扶持常助力步
屨得平穩隨身共游息夙懷冰雪操文彩炯然出豈無
靈壽杖優老榮祿食刻鳩仍慮饅寵賜臨几席遂令衰
朽資無意乞骸骨何如知幾士逍遙在衢陌世路漸艱
險老境亦遄疾與爾且從容免為物所役向來經行處

風雨長荆棘出門今不遠攜以慰朝夕相從憩松澗
斲放枕蘚石雖知有此能寂寂倚空壁摩娑惜良材造化
闕靈物用舍自有時散逸興何極

題通微齋

道體本無迹至隱不可見彼美方外人達此弗迷眩寸
心造幽玄寂然該衆善真機忽顯露妙用生萬變

送周士顯

倉官鄧明可覺非先生之子文藝可重攜東倉周士顯過余

且曰士顯年富志勤簡冊遊於四方貨殖為養親之資自以
疎於定省將歸聞子而願見盍為詩以貺其行余於士顯未
締交而為鄧君所與不敢泛以貨殖者視之贈以詩曰

幅員大茫茫混一年已久丈夫有遠志萬里事奔走
楚氛起西南軍壘擊刀斗嗟哉行路難歸計不可
後太倉東海濱寶貨萃淵藪州民已安居船兵或
相蹂雲飛蒼山顛客子重回首還家信可樂再拜為
親壽江魚鮮斫鱠園杏新薦酒薰風樓館清論文集佳

友所願成德藝勿用矜富有平康如可見待時宜靜守
努力及壯年修名期不朽

乙未四月五日

已上辭達集

癸卯閏三月十九日奉旨代祠寶公遇環中子
於山中送余出寺余止之環中子曰不出圓
悟關因續為句

不出圓悟關已入清淨境長松閉虛巖閒坐弔孤影我
行寶珠林聞君萬緣屏意將叩玄奧未敢輒呼警童子
倚馬睡侍卒息馳騁飛亭攬空翠木末潮萬頃乳然忽

我即握手語高嶺脫屣人世外豁若春夢醒遐霏樓沈
寥幽雲蔭蒼冷萬葉發遠香半天覺清迴山水多勝事
興到暫同領嘉君匪逃儒默几聊習靜形迹若異塗一
理內自省樓閣起太空先見常炯炯沸海指龍濤神光
破溟滓惜無浮生閑共此白晝永下堦踏重蘚倚欄瞰
方井天地一逆旅誰宜歎萍梗送客臨虎溪餘情詠佳
景何當從之遊慰此心耿耿

次韻劉彥炳典籤感秋七首

涼風肅庭戶愛此山氣幽森然林間葉條爾水上浮維
天有四時高爽莫若秋中情苟恬晏無勞慕丹丘
我本隱逸人手種籬菊黃養真亦好道忽已五十霜夜
涼不能寐稽古燈在床天明驅馬出秋興滿江鄉
英雄逐秦鹿諸兵日相侵義師獨縞素感動天下心三
傑功名顯亞父終陸沈時方求善策不計陳平金
狐桐倚絕壁長養材質竒截為焦尾琴奏成白雪辭倘
非爨下聲知者復誰其物固有佳遇待時何足悲

名爵得固易設施為甚難房杜居黃閣功業彌兩間志
士繹遺經有得心自歡一朝乘飛雲龍鱗或能攀

切直慕汲黯孤忠憫湘纍懷才若盡展膏澤靡不滋每
思湯武興能用伊呂為君子處心正何嫌迹逶迤

九月霜未降青溪尚瀰漫驚飈颯蒲柳蒼桂秀團團倚
杖觀白雲孤飛時往還窮達聽天命怡然絕憂歎

次黃觀瀾韻二首

治古麟在郊山氣結丹甌淳風變禾黍列國事吞併秦

隋雖富強莫與仁義競所以王者興四海蘇久病理金
地脉寬遐壤悉退聽大致文武才摠握造化柄江漢日
以清嘉魚薦芳飮邂逅有君子知幾適天性

作室貴杞楠炊黍資釜甌雄才萃天策六合遂兼併古
今一俛仰維人信無競勿言歲云邁學老無疵病高飛
擇木棲好音動清聽右掖蒼栢陰揮筆司文柄時相最
好賢招邀共觴飮偶幸接微吟獨慚野夫性

看松庵

此以下三詩為
章君三益賦

太古有積翠怪虬託窟宅皮鱗老閱歲髯髮硬如戟爪
擘層雲開夜攫明月食偃躍天可依忍冷冬不蟄路絕
人罕到一士卧空壁每從晨啓扉終日對森碧相看久
無厭稚子笑成癖昔自初覽時萬松皆歷歷涼陰翳憲
几深黛滴巖石無乃肉眼觀玩物猶滯迹邇來坐庵中
一松了無覲不在形色求能以神氣得堅朴藏大用後
凋秉天德幽懷與俱化此境遂真適好風忽相過清音
起冥寂

煙雲萬頃亭

化工出竒變誰哉執其樞山川氣忽凝渾渾一色敷大海起雪濤宛在平地鋪煙耶果雲耶脚底萬頃餘漠漠混濃淡悠悠忘卷舒縹渺亘林野奄忽彌八區南北知幾阡東西幾陌踰諒無町畦畝計安可拘身登太素上清曠聊自娛但見三兩峯頂露青芙蓉泊然脫世氛喜與此物俱或言近靈湫疑是龍所噓長飈生樹杪天地廓如初

唯天在上亭

一境懸太虛雲木皆脫洒去地隔幾塵結亭稱吾雅扶
桑浴朝暎每在几席下仰視獨蒼穹更無最高者笑撫
喬岳頂渤澥一杯竿飛猱不可越無怪來者寡自非毛
骨爽胡能此陶寫我欲斟明河清露濕九野沈寥與之
朋白榆手可把果能遂此懷石榻問君假

苦齋

嘗為章君三益賦苦齋二
律意有未盡再賦此詩

染指求鼎羹悅口嗜杯醕滋味非不甘過咎終自取宴

安懷醜毒豫極萌變蠱所以古聖賢身勞心志苦陶漁
困山澤胼胝平水土先虞戒逸樂東征弗寧處嘗膽與
粉參含茹不可吐炎汗務穡稼飽暖免空窶壯士不解
甲血戰拓疆宇力學在辛勤才識觀今古譬如遠遼國
歷險冒寒暑客有居深山卓行獨無侶苦節勵志操苦
藥清肺腑焦思廢寢食堅忍能自許肯美於此得勿為
艱難沮始信茶如飴何殊雋膏乳我生清苦多薄命天
賦予耐守久自安相顧樂無語 已上知新近稿

偶述

粵茲古黃國麟史昔見書開郡領三邑環境千里餘淮
漢錯犬牙大江倚郭郭亦有邾子城近在東北隅罔壘
起千疊蒼峭夾井廬頗訝前朝意乃視遐壤如元之既
謫守子瞻亦謫居竹樓冬聽雪赤壁夜憑虛適為此地
幸因之作名區至今江山間光采被禽魚我才愧慵陋
來寓情思舒兵後撫瘡痍野外懇荒蕪努力礪名節庶
不負所需

秦友諒元帥邀飲

戎帥忽踵門拱手向我語兒從金陵來江舡載酒脯請
公飲一觴陪坐無雜侶但有守鎮官新晴共雞黍老夫
慨然諾策杖至其戶盤殮已羅列爵行聞樂府不意寂
寞濱乃有此樽俎郡民方凋瘵貧家受饑苦安得皆醉
飽豐年歡屢舞

服藥

服藥功亦奇藉以益五臟閱世五十三頗覺元氣壯鬚

髮白數莖黝者固無恙先醫神聖流遺言豈我誑精神
苟內守血脉自和暢厚本塞病源邪沴不敢向吾儒傳大
方又出醫家上集義體自充寡欲心不放慎言節飲食
砭針戒流蕩遠則民瘼蘇窮亦身粹益道德永昭垂後
天不凋喪

新晴有感

今日復何日見此天氣晴上帝憫下土欲遂苗稼生民
久苦陰晦再遇白日明愧我初守郡惠政未能行頗聞

近年來差繇事匪輕三時勤農務冬藏不滿籬赤子空
嗷嗷使我淚如傾仰視蒼空高無雲蔽太清吾當訴真
宰早致天下平

見月

一月不見月却在屋西頭童子喜來報還我故玉鉤

揀葉

揀葉垂萬珠碧重枝亦俯驚問此何因白晝霧如雨

鋤草二首

鋤草力亦勞根連土如鐵草深固荒穢還疑伏蛇蝎
鋤草廢屋基更剗故瓦屑拾得古銅鈎蒼翠不磨滅

書事 三十韻

離家仲冬望沂江至鄂渚淒風裂重裘大雪慘行旅蹉
跎歲華晏洲邊感鸚鵡今年春二月璽書命守土兩日
抵黃州又值連月雨披榛古瓦塲誅茅創廨宇四招復
業民瘡殘必摩撫事簡雖得暇懷國鬱心腑夢登閣道
上隔水不得語覺後山月西孤影在荒堵新晴雲霧捲

南方早炎暑夏衣家未寄晝汗生腹股對客捫蝨談癢
多翻成苦土無絺綌賣亦有乏資與空存麻城名不見
製白紵赤日爍閭閻卉服多困窶一物差可意美竹產
村塢削皮為枕篔簹纖巧類織組涼光泛琉璃病後難寢
處此身不足惜所願六事舉閔茲鋒燹餘民命滿荆楚
可怪近日來舡兵忽暴禦快槳躡洪濤劫貨殺物主登
岸拆郵亭伏莽襲商賈巴河遇三人投之急流去一人
浮水還赤體無寸縷疆域幸開闢道路乃齟齬偶逢使

者歸封書聞政府敢陳骨鯁言天高聽常俯踪跡懸幽
遠庶效涓埃補

飛蟻

巨蟻插兩翼形與蜂螽類羣然穴我室齧肥若錐利尋
羶行案几乘間穿衣袂童子塞罅隙又出屯滿地有時
忽飛揚喧鬪爭意氣高或登棟梁近或棲褥被或落頭
面上或依墻壁萃見者輒怒憎予獨無害意念其造物
生似知君臣義但令掃常潔迹遠自清致

述椀

有客寄書來遺我白瓷椀
古人勸加飧感茲意何婉
旅舍乏此物童僕欣滌澣
分送兩同僚無則視為罕
欲效銘盤盂飯頃亦自勉
飲食勿過飽注水戒盈滿
豈獨口腹計去道庶不遠

墻頭草

墻頭草三尺俗稱野紅花
幹脆皆芒刺葉亂多欹斜
托根亦何危疾風日相加
眼前愛瀟洒苦被此物遮
一時

艾夷盡幽景即滿家塵垢翳人首誰能不梳爬從是蘭
在門尚云鋤去佳

蛇蛻

平生惡蛇虺不欲見其形長蛻忽掛墻陰風動餘腥昆
蟲乃有此含毒性不靈一蛻一長養速刈積草青蠶蛻
繭盈箔蟬蛻離汙濁龍蛻氣乃神陋爾留殘殼螫手急
解腕為害古來惡劔斷炎漢興笏擊中丞卓深山大澤
去慎勿穴城郭

苦疥

奔走二十年一身事鞅掌潔素無瘡痕但覺肌膚長自
從去歲來晝夜苦疥癢爬搔血濡爪手足生勞攘纖虫
穴皮內蠹我恣所往恐是心火炎精神減清爽盃茶服
苦參效驗不可強何況民疾多元氣待培養當使疾痛
除臨風動遐想

酒

人以酒為甘我以酒為苦平時愛靜重醉後輕言語容

儀漸不莊咳唾且頻吐目花散萬蟻細字卒難覩事重
忙亦輟面赭羞自俯大禹疏儀狄阮籍儕惡侶聖狂天
壤殊可以警千古

寓意

四首

鴉

諷為善也

世俗惡鴉鳴每以為不祥或稱亦報吉兩說皆渺茫禍
福人自致物豈預度量君子循善道自然天降康萬一
遭不虞有命莫可攘小人悖理義鬼神罰百殃僥倖或

安寧氣數乖其常泛觀未定天倒置如未臧事从天者
定曾何爽毫芒飛鴉啓長喙適意自徜徉默坐澄萬慮
聒耳庸何傷

蝟

惡
也

昔年館北方壁上蝟數箇體圓尾螫人肌膚慘如剉今
年黃州居黑蟲几前墮長股類螳螂雙鈴恣掀簸隸卒
走擊死我斥其太過卒跪前致辭敢達使君座土人亦
稱蠹一審皮肉破朝痛抵暮夜酷毒難坐卧飲食不能

殮更長忍饑餓急候雞一鳴痛止家人賀此物不可留
見之當擊挫我聞如此語咨嗟顧賓佐讒口更傷人古
人遭速禍

鰾

刺貪
暴也

孟夏魚苗生纖纖滿波內一瓢數酌千似有游泳態江
頭聚城市買者動運載歸家放池中看養情必耐每朝
飼飯饘至午投藻菜長育日向深洋洋可人愛其中有
鰾魚恣意張巨喙身長多氣力來往食同隊但見魚漸

稀將謂深潛晦童子入水觀唯有鱖魚在養魚莫養鱖湖
池利俱廢用將莫用貪邊民生怨悔雄威肆吞噬繁刑
更苛碎家家棄青苗遙遙投北塞國計果何如令人發
長嘅

墓

刺無益也

蝦蟇汝何物形狀無可取舞舌掠青虫怒目腹如鼓忽
爾肆大姦食月不肯吐飽腸撐異物廣寒清虛府投劍
上青冥我怒且斬汝奪取明月還死骸投下土杲杲太

陽出當午爆為脯制藥能療疔功神小兒女更有目上
酥解使瘡瘍愈其物固可憎其用或如許却笑蚩蚩民
貌俗昧今古在世一生長酒食灌腸腑視物有不如終
身竟何補

當門小山

山脚踏墻頭全身盡呈露殆類知己人豁達吐心腑秀
色排闥入意多默無語晚來白霧起對面不得覩夜坐
虛簷下惆悵失佳侶曉翠忽舒顏為爾早開戶

石砌方池

石砌小方池四面皆一丈僅同碧簾舒未易測限量地
底泉脉通江海發清漲光涵浩浩天星河潏搖蕩譬如
方寸間瑩澈萬里暢移牀狎清泚宛在鑑湖上

江色

竹屋晨啓關江色直飛入空碧壓几案陰陰四壁濕玻
瓈作天地冷然手可挹萬象隨升降元氣動呼吸臨岸
步觀漲石堦没千級岷巴與湘漢衆水大會集合流東

北去海水亦起立

龜頭山

我聞龜頭山乃在麻城縣東離八十里高峻遠先見伸
頸向南行欲矯仍俯顛巨吻豁舒張穹脊圻紋現銳峯
尾突揚垂隴足深淺戴石被介甲噓雲零雨霰彷彿洛
書出肆兀海鰲扑繇延地一舍巖嶮行不遍形貌肖靈
真活動生孽變不知在何時傳自舊俗諺竊食太倉米
官耗歲常游糞田東義州豐肥最淮南天心惡饒暴猛

風激飛電霹靂振額下鑿去唇一片地靈鎖趺爪骨死
永不轉至今涎沫凝石乳方氣扇丈皇避暑亭過此暫
留戀試劔斬石裂馬跡尚可辨禪寺傍龜峯兵火燬樓
殿羅漢遺脚蹤錦綉生采絢虎跑清泉湧飛瀑日光炫
矮碧千年松不盈一尺羨石面開小蓮或白或如茜佳
草解百毒重樓裊金線二級四樓垂三級九絲練雌雄
駢發處羣草停蔓莖有蛇白花紋剛尾挿石健直立長
丈餘吐氣毒熾煽飛禽觸即僵隨吸下供饌又有鼈皮

蛇褊闊類街面尾尖首如狗吐絲草頭纏人行犯其絲
逐啖恣所便曾遇五獵犬一犬被其嚙腹飽癡不動四
犬怒齧穿野人昇入市山海經未傳白艾最可妙土產
入貢獻低葉拂婆婆娑大葉展蔥蒨草深妨長茂耘耨如
治佃端午官採刈穰毒先祭壇精製似純綿礪疾勝瞑
眩一炷火力透貫串速如箭暖具作氈褥裹膝療寒倦
僧名張化主鈴響起塔院遂名佛道艾且可充贈餞此
事得之誰羅判吏陳憲

晚涼

孤螢屢明滅長飈驅濕暑幽枕擁虛窻夜聽竹間雨

芒種前雨

兼旬天氣晴確曝龜坼山農欲移秧三日沛甘澤

黃老

神哉變化機黃帝堯舜民垂衣民自化制作初盛美皇
風與帝德軒轅會終始上行羲農業下肇唐虞理斯文
昌聖統大法建人紀末世怪誕流放蕩言僻詭膝行崆

峒山問道廣成子鼎湖晝升天冉冉乘龍起羣臣攀鬚
墮抱弓葬冠履乃為方士祖繼者獨聃耳秦漢稱黃老
清靜遂做此聖人亦人類有生必有死安得臂為翰腐
尸青冥裏宣尼贊周易三聖同一軌躋老儕諸黃無乃
傷鄙俚或云黃石公倒置尤非是嚮使鄒孟出排闥豈
得已醫家祠有熊貶與方技齒我久厭俗談一刷萬古恥

示後

教爾諸子孫切勿慕富貴方冊與田園功勤有滋味

悼故妻喻氏

世治壽為福唯恐不百年天下兵興時病中福亦全行
年四十七伏枕竟不痊非天亦非壽正命賦自天夙昔
性婉婉志操仍冷然父兄富田宅姊妹豐貨錢嫁為貧
士妻殆類少君賢資送物固華澹素乃所便身不服錦
綉首不飾珠璣心不好暇逸口不嗜肥鮮乃肅閨閭儀
恥為粉黛妍先母未五旬性嚴常見憐緝麻躬機杼具
膳進几筵燈下勤補紉宵晝分遑眠籬空無私錫有即

獻姑前勸我廣儒業日夕當乾乾居內理家務因得力
學專充貢赴南宮點額辭幽燕檄作書院長金陵坐寒
氈為我奉母來承顏意彌虔賓朋常滿堂酒食羅俎籩
再調餘姚山孤踪涉長川在家能色養母心免懸懸江
南開大閘幕下叨備員石城奏雄捷銜命使淮埏風塵
塞道路百里如數千慈親念行子加飡瀉氣纏煢煢奉
湯藥深夜更煮餐心勞不可救慟絕鬱莫宣慎終禮必
誠淺土封亦堅庶冀良人歸中心無悔愆移家指鳳臺

華省初依蓮臨行輟膏沐其母問何緣再拜懇致請方
今烽火連郊野難安居願隨母問遷未能報劬勞不忍
更棄捐母意似未俞挽之強登船其族後遭兵母獨遐
筭絲送終畢大事篤孝情勤拳生長兩男兒教以攻簡
編怠逸必切責不為私愛牽日用有節制時祀常潔蠲
忽我病二載將謂難久延何意壬寅冬瞋目在我先是
時領公務夜宿郭北田意若待我別氣息猶戀咽達旦
望不來長逝魂翩翩日午及到家偃卧面覆綿頭髮如

漆黑容色清娟娟憑牀喚不醒揮淚深徹淵不得親永
訣衷腸疚如穿慘慘夜無寐鏡破安可圓輔翼衛輶車
相送城南阡身雖不及老生來少憂煎時危不識兵歲
飢不斷烟禮義足自防又合七誠篇有子俱在侍有孫
可紹傳生順死亦安無憾入黃泉姑孰小佳山骸骨終
當旋同穴在異時述此垂曾玄 已上黃岡寓稿

秋夜

秋分氣初爽燈火新照夜蟋蟀在我宇鹿豕過簷下商

颺夏松竹聲樂殷韶夏旅人歎空室聽此稍慰藉四時
寒暑代秋淒殊可訝山川變寂寥草木動衰謝況乃尚
殊方未得稅星駕自非疆寬夷壽結莫傾寫命途有或
然意欲問造化蒼然默無語列緯芒彩射漫漫未能旦
天地一邱舍

病體

病體異疆年微涼即歛篔丹心雖故吾奈此老冉冉血
氣盛必衰節行寧或歎愛彼古松栢不事柔荏染卒吏

意未諳笑視太清儉舉按踈酒肴汲井煮菱芡持守固
一定所處隨夷險思昔軍旅中聯篇飛文檢將相相後
先旌旗互明閃萬馬被精鎧獵車載驕獫執弓陪射耦
發矢注剡剡近歲違康寧伏枕謝丹臉臞勦漸可憎眷
顧難以忝惜無智勇資僞功奮光燄又無康濟才事業
垂琬琰恐與秋草零行路得譏貶尚覲素志豁一勺助
漱灑

夢覺

夢覺山雨來萬點擊虛瓦泠泠玉磬音墮我羈枕下回
颺撼松濤曲奏迭高雅此身卧釣天傲睨洞庭野造物
慰孤寂作意為陶寫殘夜破幽閨心耳俱洒洒清吟答
洪調勿謂和者寡

桐城雜詠

四首

寂寂山之阿佳菊發崖谷人言采其英延年且明目紫
蕭間雜生修莖密不曲蔭此婆娑叢見蕭不見菊筮人
求靈著指蕭即其屬刈為五十籌捧之進玄櫝尊閣潔

室中焚香致恭肅解韜左右分假爾吉凶告恐此或未
神掇取無乃速金甃豈不芳一時意未欲悠悠歲云暮
凌寒抱幽獨


仁杏兩巨株夾立門左右栽植多歷年幹直枝葉茂兩
淮兵禍烈邑屋殘燬久歲徵戰艦材窮谷斧斤走居然
脫戕斃疑有神明守此來築室居乃喜見駢秀西株戈
戟張東株車蓋覆又如衛士嚴猛氣出介冑主人愛護
之從此保真壽物遇自有時不必計遲驟

晚窻坐未久忽若松風鳴問言何所鳴荅云澗水聲我
來已再旬不聞此聲清今夕特爾殊潺湲復錄錚豈非
冬寒候萬樹淒風生飄蕩震原野屢噐雜營營羣響有
時輟原泉獨流行晝夜無息機天然發韶英去為江與
河洪濤播大瀛因念古君子名揚恥過情美德有根本
廣譽久益榮

舍北有廢園灌木深且蕃翦鋸忽明豁有物峙草間瓌
頗似人立乃是石假山汲泉洗宿翳三峯各蒼顏亦鍾

神秀資似無斧鑿痕此地山既多層巒繚周垣煙霏媚
朝暮晴雨皆可觀云何昔人意因假遂遺真思欲廬峻
頂崕嶮悉下陳泰華在我闥浩與寥廓鄰

已上鶴沙小記



陶學士集卷一

欽定四庫全書

集部

陶學士集卷二

詳校官中書臣呂光復

覆校官中書臣朱鈞

校對官助教臣黃昌祺

謄錄監生臣羅翹遠

欽定四庫全書

陶學士集卷二

明 陶安 撰

七言古詩

送易知事并引

易彥昭南陽人蚤游京師試太常掾遷長秋陞太平
路知事位在郡幕亞總六曹之綱贊一府之治任亦
重矣其性情寬和不為峭絕之行不取皎卓之譽法
行而政舉郡府賴之閱三載代者至為詩以志別焉

詩曰

青山之陰江之濱郡城晏然民俗淳使符煌煌來貴臣
幕府贊畫多佳賓君兮冰雪為精神中原人物何彬彬
卧龍岡頭月如銀清氣鬱蟠鍾在人壯游燕巖登要津
聲光上徹天之宸宗祧禮制得具陳長秋佐政功不湮
恩袍綠映宮柳春袖中勅旨如絲綸上承侯伯諧同寅
所喜境內無譁囂清風吹遠案牘塵芙蓉香冷波粼粼
水天紅光日吐晨乘馬上府參朱輪繭絲歲賦五百鈞

十四萬石米滿困省命督集毋擾民屢嘉勞績超等倫
溪樓峯巒連翠旻風烟侑此盃中醇歡騰棣萼榮蓂蓂
咲看佳兒雙玉麟忽聞書考去志伸棗陽別野毋逡巡
願言壽分堂上親願言顯要早置身綵衣輝映金魚新

送夏弘叔

并序

入粟拜爵之令始於秦而盛於漢唐權宜應變以佐國
用間有異才出乎其中若張釋之卜式黃霸皆以資登
郎選晁錯有言爵者上之所擅出於口而無窮粟者民

之所種生於地而不乏其意有由然矣至正甲申中原
饑饉天子恤民阻饑賑以府廩全積循漢唐舊以爵募
粟由是夏弘叔任巡檢於草市弘叔雖長富室自處歆
然其父庾夫延師家塾以教之遂涉經傳屬文哦詩精
琴操良於翰札焉草市隸今天臨路志稱其地有舜遺
風人多純朴王黃州碑謂瀟湘為洙泗荆湖為鄒魯弘
叔巡警茲土保安居民清肅闔境乃其所能今將沂江
流浮洞庭南抵於湘潭瞻衡嶽望五嶺以據其文氣以

耀其武備有日矣其鄉儒師林達之錢彥良造予門持
緜軸求文為贈遂述其事系詩於左云

洞庭之南雲陽墟祝融靈峰照天衢青衫萬里游炎都
戎韜小試羅兵及草市聚落鱗瓦鋪駭此警邏來文儒
當塗名家千里駒椿陰如雲庭屢趨毫端春葩五采敷
光掩金壁珊瑚珠宅鄰橫望高鬱紆三十六朶青芙蓉
幡然應詔發廩儲穰穰白粲連檣輸羸民含哺旋昭蘇
勅書褒寵金章朱碧湘秋澄冰玉壺宦途南逐鴻飛迂

花村月夜驚吠無笳鼓聲起姦攘逋仰瞻玉帳金虎符
繡斧飛霜悲兔狐塵開官舍窓日晡嶽雲紺翠烟模糊
長沙酒香呼木奴醉眠琴榻紅氍毹載雲旗兮颺控車
蘭聲桂醕招三閭咸池音杳龍尾徂湘妃鼓瑟懷蒼梧
客鄉哦詩不可辜寫入瀟湘八景圖

送秦君用

并序

秦為當塗著姓豐裕累世君用祖若父皆敦良確慎氣
無驕盈習無縱逸可謂富而仁者也君用得繼承之道

家法尚儉於周卹困餒無靳焉乃歲當闕逢涸灘齊魯
燕晉饑朝廷遣使分道賑民聽入粟者拜官君用遂發
儲積方舟以載浮于江達于淮選部注寶慶路新化縣
蘇溪巡檢君用赴官而南其地隔大湖邈在邊徼雜夷
粵之俗然閭居族聚火耕水耨者皆國之赤子樂生惡
死性所同也攘竊弗寧豈其心哉由綏之寡術導之不
素衣食匱而禮教無聞幾何其不相胥而犯法也雖嚴
於事果足以盡禦暴之方乎余嘉君用應詔不違敬也

施惠於遠義也仕而效勤忠也既富而仁其善又如是
宜有以華其行故作詩送之詩曰

萬山丹翠浮楚天熊蹲龍奔隱雲烟長沙零陵相後先
一水走碧雄濱川地饒黍稷麻麥田瘴不為癘暑不前
蘇溪僻境民受屢蜂屯魚貫紛牽連草荒公解屋數椽
鼓角聲撼天南邊秦君下馬藍袂鮮官閑晝永如神仙
令嚴兵伍采棒懸平蕪月白犬熟眠出自富家真象賢
寶視經書唾視錢平生周急心所便况乃募粟綸音宣

堯湯曾遇水旱愆從古有饑無此年聞之殊覺心惻然
我發我庾實且堅瓊粳滿載江上船順流不日經淮壩
鶻形久病成甦痊報以美秩天官銓御煤香濕黃錦箋
手彈冠塵理腰纏春風溪亭飛柳綿銀箏侑酒喧離筵
帆開水驛弓控弦洞庭浪噴蛟魚涎巍峯隱隱飛鴈旋
岸口迓卒森戈鋌峒徭怙伏無警傳滿簾日色薰蘭荃
公田飯飽跨錦鞦入城為訪濂溪泉

菊泉

并序

菊能輔體延齡根莖花葉皆可服或曰南陽酈縣有甘谷菊生被崖大菊落水得其滋液泉為甘馨谷人飲而上壽辨者曰諸花之根唯菊淺露水源既遠香豈由菊設使以花得香不過秋冬之交爾夫水甘淡鹹苦各因其源安知無菊味者故酈泉之芳匪因菊變予嘗折衷其事以謂地產宜菊則精英之氣流通土脉與水相感古法季月採以上寅春曰玉英夏曰容成秋曰金精冬曰長生是精英之氣無間於四時若大菊落水與辨者

之說或未然也。番易黃德輔業醫號曰菊泉。訪余求詩。余亦感其善療。賦詩寓意以菊泉之德歸之不專美於物焉。詩曰

中央氣和連混茫。金精共鍊秋花黃。靈根綿絡澗谷旁。真英聚入幽泉香。山中百卉不敢芳。日華月魄涵銀潢。冷然入勺風露涼。乾坤甘滋流肺腸。山人童顏壽且康。七十八十猶云殤。番峯老叟醫師良。何曾足跡游南陽。情甘隱逸與世忘。澹然迹踈紅紫場。心淵澄瑩波不揚。

濯纓不必求滄浪舊家留得軒岐方刀圭竒驗清膏育
發開千古金匱藏丹蟠龍鼎芙蓉光垂亡者存弱者強
惠澤及物何可量此菊生意盈藥囊此泉味比醍醐長
所願仁壽均八荒隘彼酈潭居一鄉飄飄霞佩雲錦裳
携兒過我登溪堂是時東籬天雨霜寒蕤照水金輝煌
授我寶訣期榮昌神舍內完絕外戕身輕儻可八翼翔
蓬萊弱水天風剛

李氏孝義

并序

甚矣天道付畀之重不可失也秉彝義理之良心萬善
從出人具有之良心之存莫大於仁也良心之發莫切
於親也人以眇然之躬配天地三才而異於物者此也
予雖不識李良夫聞其孝篤於親義周於族推其仁而
有序其毋宮氏令德貞節類古烈女良夫幼失父長而
造行不羣毋訓有素也予念夫孝義之實根於良心也
孝義之名足以勵俗也故樂道其事傳曰仁者必有後
尚綱果以文學顯天將豐報於後人尚源源也嗚呼懿

哉乃作詩曰

魯之為國多秀民禮教遺俗醇乎醇中有孝子全性真
務學唯先厚天倫骨肉之愛始自親厚我能施睦宗婣
母氏派出虞公臣秉節操心異于人夫也竟終闡幕賓
江東客途孤愴神歸家奉舅顏和閨舅兮不知兒隕身
不將臉照桃花春栢舟為誓甘苦辛燈窓課讀勤績紉
漸見四子英牲牲重闈鶴髮餘九旬孫枝滿眼皆儒珎
盈門弦誦延縉紳簞笈遠至咸循循表厥宅里墨榜新

光映岱嶽黃河津良也孝義蓋有因積善有報禎祥頻
後賢思齊世蹈仁河嶽久長能與鈞

徒氏世德并引

徒氏出自姑孰徙居漂上三世矣仲清通國字音聲為
姑孰學錄館穀于其從祖家予嘗識仲清之父彥和及
其兄伯淵今見行卷諸作則知徒在漂者多文士予視
之尚鄉鄰也為述世德詩竊取比而賦之義爾

青山昔年有鳳凰移巢中山瓊樹蒼鳳凰凌雲去渺茫

鵷鷺遺族皆文章金玉為羽錦繡腸渴飲河漢吞奎光
中有一雛在高岡衆目爭光覩嘉祥嗷嗷幾聽鳴朝陽
音如重譯流宮商出林沐浴雨露香思欲聞韶舞巖廊
振翮一飛回故鄉翩然照影姑溪旁一朝瑞采生我堂
驚看異物來何方撫此靈疇詢其詳乃匪物也人之良
手探詩軸出錦囊始見一家文氣昌叔姪昆弟翰墨場
鯨鳴玉奏聲鏗鏘我聞君家世德臧天降百福紛穰穰
若祖從吏筆飛霜狴犴生死分毫芒彼何人斯怙富强

虎吞無辜如犬羊父子誣服情可傷獄成忍使膏鈇鉞
獨以智識燭姦狷確言當庭折巧簧暮夜萬緡投賄賊
厲聲正色麾門墻渠魁首實無遁藏一鞠服罪甘斧戕
官民共喜寃疑彰不矜不伐如尋常野服歸隱享壽康
無心雲路騰飛黃階除繽紛五色裳玉樹競秀芝蘭芳
我識彥和溫且莊伯淵積學真賢郎仲清筵羽鶴鷺行
欲見其餘猶未嘗溪窓烟月琴在牀寶坊教席松風涼
客來烹茶當酒腸甑炊紅粟釐為漿鳳兮凰兮千仞翔

覽德而下情悠長聽歌此詩非楚狂飛上太清朝玉皇

廣陵楊節婦

堂上舅姑嗟老苦膝下兒啼未能語孤鸞何心鏡中舞
綠鬢年才二十五甘旨供餘勤鞠撫舅姑歡顏兒飽乳
誓言一心無二主本欲同歸九原土手拋粉黛獨組
燈照空幃淚如雨嫠居守義能自許觸目艱難不憂沮
夫天寥濶幾寒暑兒有文章輝藻黼竹西綺羅炫芻午
翠箔朱簾闔嬌嫵五方雜俗日殊古貞烈無聞世何補斯

人秉德天賦與乃以三從鑄肺腑春官旌名真盛舉共
看光采生門戶丈夫明理蹈規矩鬚眉蒼蒼本翹楚為
臣不幸遭險阻忠國立身當審處爵祿才猷輕一羽大
節或虧何足取嗚呼大節或虧何足取不及閨中賢婦
女

題柳如菴小影

當塗之黃池人宋神醫
也有可用方行於世

如菴神醫妙天下後來安有如翁者我恨生晚不識翁
形神已落丹青寫漆瞳雙炯雪髯踈豐頷童顏意瀟灑

丹臺玉室本仙流藥聖驚人自天假宛陵翁季人中龍
相見情懷即傾瀉家藏醫書千種餘竒論名方歸取舍

宛陵乃吳正肅公其二子履齋退
菴家藏醫書甚多如菴因得遍閱

硝黃用少參苓多指

點孫韋聞見寡烏紗籠髮青霞衣何心朝服金犀鈿蹇
驢緩策引新駒何心雲路如龍馬舉頭自有天為鄰富
貴於吾猶土苴一筇一笠相隨處入眼溪山總幽雅僕
夫喜色望歸塗落日池濱炯萬瓦黃池一名池濱六丁下取可
用方造化茫茫入吾把三彭勦除清不寐霜杵聲中別

紅炮丹砂鍊養艷金花玉露精英挹瓊傘高情追逐羲
皇人豈特餘功及尻踝還君此圖三嘆息兩袖天風颯
秋野

陶培之中堂試詩送其歸

硯池斗墨飛雲煙樓前迅灑春容篇主司撫卷賞才美
况乃與學窮先天江蛾雲際顰黯然忽看翠展雙嬋娟
川靈錯愕感齒錄詞情飄逸如謫仙天上文光現斗躔
旗鈴佳信人間傳更當秋香分老桂瑤臺玉宇飛翩翩

大府侯伯爭下賢酌酒賓墀豐俎邊簪花小作杏園宴
贈以文錦榮歸旋雨冷湖軒夜如年聖賢心法宜精研
少年高科古所戒勿為利祿情拳拳

送文元祭游學杭城

錢塘繁華甲天下雨霽湖山翠如畫朱樓人醉綺羅春
緜帙誰諳燈火夜一時見君真拔俗千里尋師遙稅駕
生長富貴厭膏粱雋嚼經書如膾炙采鳳鳴陽出丹穴
蒼隼凌秋飛太華栢垣繡斧風烈存椿府屏車光寵亞

名賢奕世妙有傳赤箭南金貴無價閉門功比螢雪勤
入室氣與芝蘭化自喜高懷孤月朗頗厭辯口懸河瀉
詞林驚見爛春葩聖田待獲豐秋稼寸心莫逐汗漫場
萬里當會神明舍客中昆弟共綢繆歲杪杯盤聊慰藉
胥濤海口撼風霆吳阜城心起臺榭蓮衣紅映歌艇筵
柳絲青拂鈿車帕遽令此志生蠱惑何異無知歸罟獲
直須意氣慎交遊而况習俗多浮詐策勳行矣當盛年
展卷琅然了清暇詔書今日科制復文星徹曉光芒射

相期才器擢明廷
早植棟梁成大厦
春風吹上杏花枝
天衢飛鞚青雲靴

經歷張景中泮橋觀蓮索賦

幕中自有紅蓮香
愛蓮還復臨泮庠
石梁卧波虹影蒼
水花晚色留繩床
掀髯咲語雲錦鄉
對此不覺炎歊忘
誰言姿容如六郎
安知君子之德芳
紅者不妖羞倩粧
白者冰玉生輝光
綠雲為蓋霞為裳
亭亭何畏乎驕陽
夢魂不落繁華場
若耶游棹西湖觴
玻璃在處碧滿塘

何為獨愛依宮牆願逢知己為發揚便欲乘風歸帝傍
先生才猷贊黃堂有如千頃陂汪汪心通幹直意緒長
案塵不染清如霜蓮之淨植可比方倚欄駐目聊徜徉
話中題品衆美彰無為心苦綠玉房藻芹助喜翠欲翔
菁莪樂育仍相望清芬送客將昏黃秋隨短袂天風涼

贈趙道昭

十五載前曾識君壯哉詞氣凌青雲十五載後復相見
頓覺中年須髮變人生佳會苦不多江海茫茫奈別何清

宵懷人耿予獨目送老月飛銀河東風鼓棹姑溪上乘
興敲門一相訪竒言縷縷驚座人包括周天衆星象知
音者稀誰與論倦持寶瑟立齊門幾見杏蕊紅雨落歲
寒梅雪又黃昏天借片時談咲共追憶從前恍如夢鴈
聲落枕促登途馳韞衝曉霜花重我別中山不記年為
我訪問藍橋泉一朝當路有知者相見恨晚毋歸田

吏者于姓考滿贈

隆古治具在典墳申韓刑名漲妖氛漢章唐律有定制

斷以明決輕重分云何吏曹昧大體往往刀筆煩其文
世道日降事貪刻天性敦厚頗見君高門陰德有餘慶
子孫愈遠揚清芬當今簿書出身者置之要路隆爵勲
况子才氣能出羣得祿可不煩耕耘明時需才意甚勤
誰甘白屋老無聞乍看竒驥騰青雲且聞瑞鳳鳴朝昕
金陵郡府隸臺閣蒼栢霜雪寒雰雰從容幕下出片語
案牘叢中能解紛鄱山迎客翠蛟舞金芝佳氣蒸氤氳
錦袍詩仙招遠遊荒城烟雨江之濱朱門檠戟牧守貴

咲撫白壁生餘欣
客窻雞聲梅月曙
官庭燕語槐風薰
幾多勞事咲談了
羣工斂手觀郢斤
歲月苒苒憶桑粉
回視舊穴喧飛蚊
方知宦海渺無垠
驛亭別酒成微醺

送劉生仲孚

當門一帶溪流奔
左為青山右天門
蒼林隔市祕亭館
滿天清氣曾平吞
牙籤鱗動書萬軸
古鼎香烟晝凝馥
父子兄弟自師友
天倫至樂其家獨
世路黃塵飛不到
理窟游心在深造
雲間桑梓隔重湖
艇子如飛波浩浩

劉生有三兄皆好學能文
侍親居姑孰本溧水人

至正戊子下第南歸與同貢黃章仲珍雷燧景

陽同舟仲珍賦詩因走筆次韻

鳳城酒美燕姬歌禁花紅飄金水河
雨香翠島春晝暖
魚龍陸海揚風波
天門咫尺到不得
禁此颺摧雲翼何
時乎未至應有待
壯年不必傷蹉跎
君看松柏成大材
歷歲雪霜誰見過
拂衣南出指歸路
回首京闕山嵯峨
日高原頭紅霧散
潮平沽口青銅磨
牽船泝流狂吹逆

登車避閭飛塵多黃樓憑河遠眺望身如冥鴻超網羅
客塗笑語浣羈思詞鋒捷出如揮戈天生人才必用世
豈無文藻宣金科鸞臺鳳閣總華要不然玉署聯鳴珂
丈夫小挫未為辱正氣耿耿非有它匣中古硯助神變
銅蟾飽水手屢摩隨身亦有勲業鏡依然照我顏色醜
與君今日動高興買酒共酌澆天和

途中懷古述事再用前韻

太風掃空垓下歌昔年分爭纔隔河鴻門酒酣赤帝子

回首四海流恩波臺荒戲馬春草綠美人一去傷如何
匹夫豈是萬人敵事業不競空蹉跎山川靈傑千古在
石洪竒險勞經過半天危樓兩蘇迹蒼烟粉堞猶巍峩
輕舟卸帆傍堤泊老劔出匣臨流磨長篙蘸碧接淮浦
驚喜江南鄉景多杯餘吟嘯無旅况筆戲萬象光森羅
英雄過眼俱寂寞幸際斯世休干戈同行佳友得豪雋
俯視餘子當殊科咳唾隨風粲珠玉冠蓋有日鏘環珂
立身志節當自許紛紛富貴皆從它譬如野雀匪凡鳥

翅輪入雲高，憂摩喜君氣。岸亦孤峻，厭見小妾桃顏。配
我歸拜舞，為親壽。萱花香裏春暉和。

五月旦日與黃仲珍雷景陽酌於維揚抵暮出
城曉至瓜洲有懷同貢金景蘭姚仲誠周于一
林元凱相約不至更次韻為別以寄拳拳之餘
意

蕩舟竹西聞好歌，飄如仙槎泛銀河。青樓傍市捲朱箔，
舞裙綠皺如春波。香消紅藥采鸞去，其如青鏡空寂寞。何

金盤露清筍牙白小住半日非蹉跎雪乳泉甘醒午醉
瓊花霧散與客過吹簫玉人杳然逝橋亭拂柳空栽栽
櫓聲帶晚出城去初月光吐新鎌磨梅天雨歇黃潦漲
瓜洲渡近青山多我懷初歸有髦士金姚學富精蒐羅
閩南周林師友盛未見入室操吾戈賦妙能追司馬聖
策高反黜劉蕡科荆門有約久未至回望不見玲瓏珂
黃君雷君吟嘯共蕭然行李餘無它客途分襟心暫苦
詞場秉筆肩還摩江流如黛送孤棹離觴不辭顏易酡

佳哉璞玉當見遇肯使抱恨同卞和

送石仲方詩

并序

昇秦淮之南有庠舍突然新麗者江東書院也郡書院
四曰明道南軒昭文皆先賢遺迹或老屋腐垣勞於補
葺或基構庠隘與編戶等或貧無歲入乏祭養之資獨
江東後興棟宇堅完丹堊炳炫崇嚴靚深不勞於補葺
而無庠隘之嫌貫粟出納豐儉適宜祭養有給是乃郡
士仁齋王君之創造而草廬吳先生之所規制也始長

教者四明程氏敬叔以考亭讀書法啓誨後覺文風大振近歲石仲方來長教事恪恭厥職剛介不阿優禮賓師招徠弟子員析理厚倫建櫺星門礮石購材華賈得宜宮墻改觀過者見而生敬矣程氏去官二十餘年獨見石君如此初君諭晉陵創造廟學糾錄京口泮宮代庖學事復設產數千畝今江東考滿將典郡教益當弘敷聖謨鍾鳴鐸徇轟贖警言迷其功必有過於斯矣告別歸毘陵遂酌之酒而為之歌曰

延陵季子之舊邦林麓秀鬱泉流淙文物萃美如瑤珉
隱居未許慕老龐涵潛理海心在腔書帷永夜挑燈缸
去家不遠觀大江江邊龍虎盤洪厖秦淮抱城駕石砮
精舍丹碧臨奔瀧莫言無筆長如杠文詞力健鼎可扛
論堂考鼓醒愚蠢法言浪浪金石擬上窺鄒魯驅雜隴
異學不敢操戈鏃子衿環拱心自降取友必端戒羿逢
飛觴談咲月在窻川后屏息無澁澁榻前松竹翠羽幢
雪點吟鬢秋蓬雙豕府薦與響聲如撞酌別纜繫堤柳椿

俸米載歸紅滿缸
迎門喜動花陰駟
沂河北上乘艸艸
天街雪晴馳駿駟

題張源相辛巳試院唱和詩卷

其年源相
為對讀官

仙凡相去咫尺間
弱水隔斷蓬萊山
鵠袍星散夜色皎
寒隨天風生佩環
簾動波紋燭影閑
寶兔噴落紅霞斑
三場校對時有暇
咳唾珠玉遺人寰
我賦浙江徒手還
丹桂可望不可攀
後來戰藝始得儔
南宮轉覺功名慳
大省銓衡新檄頒
金陵邂逅生歡顏
得錢沽酒慰岑寂

時出險句驚神姦袖携衆作無可刪故人各已登朝班
見君此卷動餘興行聞臚唱開天闕

送徒伯淵

城心官帑楮代錢聚於山積流於泉納舊出新日萬千
市人四合爭欲先中山才子吏律研邇來筦庫廉而虔
意氣能與長貳聯太史平準操微權寶貨滿眼衆所便
衆是凡夫君是仙坐令美利散列屢民得資財俱懋遷
飛塵障紅炎日煎紵袍雪色風翩翩斯人本為儒者賢

舊家出自姑溪邊，祖有陰德寬獄滯。子孫三世居溧川，
過庭能以詩禮傳。出有車馬食有田，族中文物紛蟬媽。
橋陰滿屋塤簾宣，淵兮吟詠三百篇。青春舉筆生雲烟，
往歲過我圭革前。斂襟拱手忙投鞭，示我以文長滿牋。
粲然藍玉淮夷蠙，齋窓清話共俎籩。論情繾綣久乃旋，
別來荏苒知幾年。忽然邂逅錢塘堦，我時南游北赴燕。
子方戰藝雄戈鋌，大江潮頭高沃天。捲簾樓望吳兒獮，
柳陰涼浮茉莉筵。東陽官酒西湖蓮，六橋雨霽山蜿蜒。

銀蟾照影秋娟娟人生離合亦可憐回首異路心茫然
蹇余萬里行役牽意掇科名蟻慕羶陸走齊魯諸山巔
冰雪積冷砭重綿都城宮闕雲霄連兩見黃榜光魁躔
春風三月紅杏妍金門咫尺登無緣歸來空室如磬懸
索居懷友情拳拳三湖東隔漲碧連五鳳樓閣凌虛玄
幾欲夜棹訪戴船携家就祿依寒氊金陵聚首喜欲顛
惠我畫扇漢隸鑄始知從吏拋槓鉛捧檄正為雙親全
故山在望歸興遄墻角短檠毋棄捐丈夫有志鐵硯穿

未可斷方皆就圓
聖經萬古日月懸
妙道浩浩何淵淵
經濟功用彌八埏
學之有要業必專
窮達用舍所守堅
不曰富貴浮雲然

送易德輝

金鴉噴火炎塵紅
晝長兀居圖史叢
有客過我如清風
忽驚秋涼生坐中
詞瀾分得西江雄
少年旅游江以東
缺歌聲斷囊未空
自喜知已多名公
吟邊點染物態工
鳳臺烟雨山空濛
綠鬢曉映青鏡銅
出門路與雲海通

翩然野鶴超樊籠便欲獻榮明
光宮夜夢慈親淚兩瞳
更有祖庭垂白翁迢迢千里心
有忡寄書不見南飛鴻
林臯一葉飄梧桐飛雲在眼催
歸蓬到家問安瀟瀟充
重整香芸辟蠹蟲翠筠繞屋聲
玲瓏直節珍材無與同
截玉上獻妙有功協律不下嶰
谷簫一吹瑞鳳降碧穹
再吹三吹和氣融四吹五吹年
穀豐六吹成奏帝德崇
終于九奏四海唐虞隆

送張學正

并序

國初徵用儒雅在位者舉其所知故起自草澤拔居侍
從林立相望共建太平之基逮元貞大德間布衣被薦
猶得登翰監司儒臺典郡教厥後限以資格受命者寡
然四海髦俊雲翕闕下思效能于時者益衆或遇舉主
則又板學官於行省亦可小試其才矣漢留侯苗裔曰
源相者居信之龍虎山嘗觀光京師其所交游多大官
名人言路條其行能交薦于臺事聞中書傳檄江浙行
省署為學官歷台州奉化學正調金陵源相盡董正之

責其德剛而方其儀肅而安諸生望輒畏敬月有書季
有考凡廟祀之脩庖饍之供與有力焉至於挺身特立
抗論公道不為物所撓不為勢所惕尤人難能今考滿
矣使其在國初或元貞大德時則受薦不止為卑官必
能接武諸賢吾不得而高下之也於是賦詩為別其詩

曰

天星執法環太微選仙上界霜牋飛先生面帶虬虎威
五色文燄騰燕畿使過先朝名必輝共佐鴻業高巍巍

旅游經年塵滿鞵輦路遙望交龍旗固宜從橐趨彤扉
不然玉堂依紫薇白雲飄翩傷遠違捧檄又作江南歸
霞城凌空堆紺緋當窓芹浪香菲菲秋宵官燭照棘圍
對讀詞義無訛非甬東學舍垂絳幃誦絃成風人具依
貳教昇泮忘輕肥館下弟子英而頎酒邊掀髯筆屢揮
爛如銀河雲錦機屋頭鍾山鬱烟霏踈檣月色窺金徽
功勤頻絕竹簡韋坐令秦淮如泗沂栢垣羣公鷹隼翬
謂此美績前所稀卷中試藝觀珠璣一朝話別生歡欬

自憐寸草承春暉有祿及養猶庶幾還家未容隱釣磯
驂騮雲路行駢駢歷身顯秩榮親闈秉璋更舞編爛衣

齊山吟

徐卿結屋齊山陰邀我為作齊山吟浙江以東古甌越
諸郡環境山嶽崒三衢峯巒甚魏麗旁走石麓猶千尋
虬昂虎矯蒼骨老奔若馬騰飛若禽山多草木虫獸品
亦有玉札丹砂金松根苓光凝琥珀叢間童影潛人參
霞屏烟藪有仙隱蓬扉楮牖無塵侵繞庭清泉助湯液

當簷脩竹鏘球琳青龍甲乙書滿案山人長存濟世心
力扶衰朽除天闕藥籠生意春森森齊山之土能活物
齊山之雲能作霖先生之德與山等名曰齊山人所欽
白鶴相招來翠岑似憐晦迹眠空林天風吹起檀袍襟
幾車聲譽聞當今雲端孤飛靈鳳翼枕上猶帶清猿音
六朝故都佳麗地騎馬踏遍秦淮潯官舍蕭閑杯酒斟
卷有新詩匣有琴囊探神劑奏工巧指按病脉詳浮沉
鐵冠相逢禮貌厚民仰司命情俱深時乎醫國當有待

功名從此來駸駸齊山之吟雖止此此言非子其誰任
送庸田僉事

庸田使者乘輅車閱得太史河渠書姚江農民西引領
庶幾來此吾其蘇傷心今歲夏秋月甘雨不降禾苗枯
海潮東回救不得老稚無異涸轍魚曩從官軍過州境
編戶奔走頻供需計畝斂錢築城去役繁未見民力紓
正逢稔歲亦饑餒遭此乾暵窘室廬往年有詔甚寬厚
恩澤至今流海隅既蠲湖田主戶米亦減水深長蕩租

皇華光臨浙江左忍視瘡痍無完膚曉霜方寒問道路
冬雨未霽行泥塗我願歲豐水旱無公賦早輸私有儲
國家富足民歡娛且免使者勤馳驅

次董參政送楊季常詩韻

總戎戡定稱雄豪帳下有客如枚臯筆端霜氣塞關口
貔貅萬隊無譁囂山環壁壘擁節旄民亦捍敵持弓刀
平生意氣感知已國步如此憂叨叨宰臣動喜片語褒
兩眼如月鑒履操燒原難留狡兔穴海濤不撼游龍艘

人主當念閭外勞不獨相業歸蕭曹時平班師拜闕下
遥睇虎豹天何高

題瀾瀾竹雀萱堂圖

為姚江王國臣作

珍禽文采明金沙相顧似憐毛羽嘉託鄰喜傍君子竹
忘憂更有宜男花良工筆意何處好林雀哺雛心使飽
北堂留得此圖看依舊春暉照幽草

次韻畫松二首

為監郡大本賦

鐵幹宛如韋偃筆誤令工匠施刀尺陰森黛色千古深

髮髯霜痕半天濕猿鶴清音恍在庭龍虎白骨堅如石

從知能事不易成畫水猶云日踰十

杜詩十日畫一水五日畫一石能事

不受相
促迫

蒼標當入凌烟筆相去青天不盈尺獨持勁節冬雪寒
長帶恩光朝露濕迴枝忽變老蛟形託根不向懸崖石
按圖必求如此材待構明堂價增十

壽詩

月當秋九屬陽數二九佳辰值初度乾龍神變出長淮

五岳生雲共環護海門躍起雷滿天大魚長蛟相後先
曉江浪濶一飛渡甘雨灑向東南邊鍾山亦有龍蟠勢
帝命控臨佳麗地滔滔江漢作藩維吳楚諸峯挹蒼翠
武臣拓境持節鉞文士經邦佐功烈膝前羅拜豈尋常
顆顆驪珠是明月重九節後再逢九氣聚九陽開九有
老人星現酌北斗遙對中營獻天酒曾聞大椿奇論自
莊周八千歲為春八千歲為秋願公永與椿相侔又聞
瑤池有萼仙所植三千年開花三千年結實願公此萼

頻得食更願招賢勲業茂禮樂光華漢唐右撫育生民
仁澤厚天長地久南山壽

送沈竹泉

并序

醫稱橘泉已疾菊泉延齡未聞以竹泉稱也論竹者曰
淇澳曰渭川唐六逸有竹溪夫竹託於泉水之上滋養
發榮翳為叢薄蔭乎流泉而泉益清雅殊勝幽人潔士
棲息覽適助成高致醫家濟物無恃乎此按瑞應圖曰
竹裏有泉色白自出飲之令人上壽嘗聞鄙人言山中

產異竹高十餘丈其徑盈尺截而為筩往往得泉甚甘
山人亦多壽考余謂竹雖植物操堅節實貫四時而不
改歷百歲而能存有壽者之質焉中虛而能容蘊函真
氣沖和融液注為靈泉盈溢滲漉嘉惠及人蓋天地自
然之神劑故沾其味者躋於眉壽此固休祥而世不常
有者醫之致用神聖工巧驅五臟之痾調六氣之疵務
納人於康寧以全其壽而已桐川沈景淵儒者也家以
醫傳六世聘至金陵遊於相府諸大帥之門療治奇驗

言論造理洞究病源自號竹泉然則沈君不徒美其名
而具夫竹泉之實其亦時之休祥而世不常有者歟為
賦竹泉之詩曰

吾聞鴻濛之野元氣厚產出異質為蒼筤千竿活翠濕
霄漢百年老節凌風霜腹中空洞含太和釀成清泉深
蘊藏朝陽幾度鳴鳳凰飛來梢頭不得嘗忽然靈源難
自秘流膏潔白生馨香吾意此竹上摩天乳之星芒吸
得甘露萬斛涼下通體穴鍾陰陽時時挹注瓊瑤漿帝

令昭蘇下土民嚙嗽一勺消百殃赤龍運水一時下玉
嬰仰視朱叻張不待鉛汞九轉功挽回天闕成康強滌
腸洗髓清膏育暑不煩渴寒不僵神全氣爽欲輕舉三
十六帝叅翱翔沈君何為獨有慕於此號為竹泉名姓
芳平生雅抱君子操虛心直節成文章活人陰功在天
下如水潤物源流長狄公籠中生意遠昆蟲草木丹砂
光東山相望桐汭旁清溪碧繞琅玕房叩門急傳使者
至聘書來自中書堂紵袍飄飄佳麗地戴笠出入兵戎

行相君英雄少許可揖而進之坐客床掃清內痾與外
狀俱入丹丘不死鄉轅門晝靜塵不揚相君留飲談岐
黃揮筆大寫竹泉字龍鳳飛舞勢矯昂持來賓幕作佳
話獨我才拙慙諸郎先生不登名利場丹顏漆髮雙瞳
方赤日滿路歸計忙慈親應倚門閭望煩君更以竹泉
施八荒躋民壽域如虞唐

送孫別駕赴池陽

青蓮居士之後身音節連篇古樂府便從大雅論正葩

猗那為宗舜臯祖兩都三國差可數南朝綺辭徒織組
隔江玉樹夜無聲巖谷風生聞嘯虎神交直到開元上
光燄摩天出天語飄颻雲海超八極金銀臺閣羣仙侶
忽聞帝遣熒惑星火斧虹旗鎮南土來向轅門拜明主
曉日麻衣光楚楚幕中慷慨坐談兵何況傳家有孫武
紫薇花下月滿池斗酒當筵珠玉吐朝政方勞柱史記
王袞正賴賢臣補人生會合苦不常驚見屏星在門戶
醉踏輕舟泝江去楊柳飛花望牛渚兩崖烟霧濕天門

九朶芙蓉照秋浦秋浦郡縣待摩撫吏者師模民父母
雖云官至刺史榮半刺才能當獨步兵火瘡殘極哀苦
仁惠存心百廢舉襦袴歌騰歡鼓舞千里棗麻沐膏雨
勤敷治道追往古再見唐虞運當午挽河洗甲天宇清
坐聽絃歌響鄒魯

送李鍊師還少微山 并序

楚樵真逸養病于秦溪桐陰凝神冲寂求無為之宗夕
陽在戶聞有剥啄聲啟闕視之有一童子手玄錦靈篇

致仙華君意曰平川鍊師仙李之南梢也廬少微山游
心于清虛窈冥晨望紫氣頰霞起自龍虎之都岷波東
環浩如蓬海躡雲而來逍遙琳室日華月英流光內鼎
道幾成矣今將乘迴飈指故墟飄飄而南子昂宣祕趣
吐鏗辭聲其所懷清夜驂鸞俾得長歌雲漢間滄溟揚
塵尚與玉笈洞章宮商舌上異時邂逅鬱羅握手話及
玉齒皓粲此其張本爾樵逸聞仙華命豁然病釋喜色
駸駸頗恨不識平川莫罄摹肖藤床晚卧想像高唐臨

風浪然而唱曰雲間蒼湖飛紫龍鼎煙光怪生芙蓉鐵
鬚化作綠玉叢仙都幻出天南峯倚嗟李下白髮翁神
交頻作玄玄宗邇聞鶴骨方兩瞳少微星窺冰雪曾頗
厭膝行訪崆峒喜與柱史仙源通黃芽徹夜氣吐虹瓊
鳥曉躡飛霞彤高翰掠過豹九重清都樓闕浮瑤穹羽
衣大會珠叅中璇車御氣搏飛蓬玉姬為酌碧琳醲侑
以三秀蒼玲瓏鳳凰盤躑憂金鍾衆中凝瞻帝之容帝
咲而言來汝童紫陽雲錦開囊封右招金母左木公中

間稽顙青牛宮賜飲鮮灑元氣充帝令下土尸三蟲倒
驅海水懸半空電光繞劍奔靈霞沛然澤物頃刻功卧
聽四野歌年豐石頭撐雲蟠鬱葱大江萬里銀濤雄五
城變現金碧融特來蔭此千丈松玄虎上奮鉛在鎔忽
驚暗室光瞳矐故隱竹石懷舊蹤平溪過雨摩青銅翩
然鳴珮嘉客從鶴背鐵笛橫秋風三天儻可一咲逢指
顧太始開鴻濛

序內所稱仙華者宋君
景濂自謂仙華道士也

送僧芳蘭谷住持明招寺

幽蘭之生在深谷不以無人而不芳鉢孟朝采墜露飲
青蓮蒼蘊停馨香谷中空明若圓鏡須彌環海日月光
傲睨天台高鬱蒼五百癡衲巖穴藏小乘留戀不死鄉
何緣比肩大法王後代演經談渺茫天花紛飛七寶牀
遠窺正覺如望洋伊誰面壁文字忘獨棲金華山滿房
定中趺坐歲月長聲音色相等妄幻自謂學佛非荒唐
冰壺石筍出雲漢飄然凌虛觀十方龍蟠法界氣紫黃
渡杯如電江聲涼偶然乞得袈裟地已被東萊建道場

東萊先隴在武義非為薦福主天堂正緣人家有興廢
寺觀經久願力彊金坊寶閣鐘鼓震馬鬣肯使樵蘇傷
我思儒門經濟業發育萬物隨翁張存心養性禪所宗
浩氣剛大仙揣量空玄衍說元有自勸人作善來百祥
雖云離倫絕世故恃此禮樂扶綱常何必火書廬其居
然後鄒魯文教昌東萊雲車自天降撫掌應咲吾言狂

送別

我思南漪不可見曾孫一朝來自宣問之云是正甫子

滿眶秋碧堆清漣
黎公穎悟乃鼻祖
以字為氏百世傳
玉堂學士瀛洲仙
佩聲鳴向尺五天
驅辭不下瀧岡阡
樓前驚倒陳龍川
天門夜開玄鶴去
鑿坡冷落黃金蓮
一家侯伯八九輩
封胡羯末仍駢肩
雕刻烹龍炮鳳篇
亦有氣雄如馬遷
自從兵革踰十年
驚心文物晨星然
湖光樹色雲錦鮮
明珠躍出驪龍淵
薊丘高閣繡芙蓉
墨君動喜生風烟
青女裁霜作輕袂
下馬長趨紫闥前
是時江南漸平定
土貢金帛豐貨泉
捧牘內府贊利權

長官幸得鄉中賢
薇花清露滴翠磚
點染物態歸銀箋
不待除書先掉臂
未霜楊柳迎溪船
南湖竹石無恙否
紅鯪紫鯉不直錢
雨晴晚秣黃滿田
醉呼疊嶂來詩筵

紀事

壬寅十月初五日陰雨停空天未夕
江城暖氣驟蒸人
蟬翼綃裳汗沾濕
輕雷數聲生變化
火鼓轟山雷流赤
長飈西來吹海立
飛雨驚鳴建瓴急
勢如萬騎怒衝擊
對面相呼聽不得
掩關漸是一更時
爍眼金虬破昏黑

蓮花碧礎迸出泉官市波濤湧三尺方當閉塞蟄蟲俯
頓駭龍蛇離窟宅怪得秋冬未降霜無乃天時有差忒
陽氣至此本潛藏發泄深機不能密或占水旱在來年
消弭災異當修德須臾河漢現踈星天地無聲本來寂
小窓獨坐對殘燈尚有寒蛩語空壁

十月初六日夜作

昨宵雷電送雨來今宵又聞天上雷紫電照窓銀竹立
初冬有此甚異哉天公仁慈萬物祖陰慘陽舒時不誤


年年秋半雷收聲何乃致此非常怒怒非其時太重復
驚起昆蟲死平陸天發殺機今見之正賴賢君調玉燭
惕然省身思過咎是日頒書肆寬宥與民更始物維新
和氣春熙似靈囿天心警戒猶未已要在事事循天理
更以仁恩蘇赤子天心轉移俄頃化為瑞雪年穀豐

病中友人寄詩遂以次韻

萬象變幻道是宗望而未見心有忡斯時講禮聞戴聖
西塾得師如馬融虛亭短燭風雨夜坐久談論意氣雄

鏗詞媚藻心所厭要使付物比化工姑孰感客老將至
喜持圭玷求磨礪病餘恐是元氣劣絕與調理民瘼同
何當躍入安樂窩先天尚友太古風誰言羣聖逝已遠
天地上下流淪淪

已上知新近稿



陶學士集卷二